

Une Cruente Joibe Grasse  
Un drame pulp

di  
Alessandro Di Pauli

**Argoment:** Alvise della Torre si svee te cjamare 1511 dal Hotel Serenissime, ma cun dute probabilitât al è vitime di un scherç dal so "ami" Savorgnan.

alessandrodipauli@gmail.com  
[www.alessandrodipauli.it](http://www.alessandrodipauli.it)

INT. HOTEL SERENISSIME - CJAMARE 1511 - DI

Une sclese di lûs e filtre dai scurets, puartant un fregul di lusôr inte cjamare 1511 dal Hotel SERENISSIME.

Lis parêts a son cence cuadris picjâts, sul sofit une scrite di colôr ros: "Impensiti di doman!!".

Par tiere al è plen di robis: vistîts, cuviertis, curiandui, sarpintinis, butiliis di superalcolics, tacis cun bevandis lassadis a mieç.

Al è clâr che la sere prime un grup di int al à fat une fieste di carnevâl in cheste stanzie.

Di fat, al centri dal liet, al duar di sbighet e dut ingherdeât tai breons, ALVISE della Torre (40), al à une mascarine di canevâl sul cerneli, al puarte un costum di nobil medievâl, al è mieç crot e mieç cjoc, al duar beât daspò di une lungje gnot di mateçs.

Al ronfe circondât dal casìn: la sô muse sglonfe e sodisfate nus conte che al à gjoldût dute la gnot.

Instant, dentri te cjamare, a sbrissin i suns de citât: la int che e cjacare tal marcjât, un vecjo che al barufe cuntun altri vecjo, fruts che a zighin daûr di un balon, motorins elaborâts che a svuelin rapits come avions.

ALVISE pacific al duar.

Dut di un colp: ALVISE al vierç i voi, alc che lu interorìs, lu à dismot dal so sium. Il so cûr al bat plen di ingôs. Un pinsîr tremont lu fâs trimâ di pôre. Ce sucedial?

ALVISE al cjale parsore di lui, tal sofit, le scrite: "impensiti di doman!!". Sot de scrite la firme: "il to amì Savorgnan".

ALVISE al sgarfe sot dal liet fintant che al cjate, tra goldons doprâts e sarpintinis, l'orloï. Lu tire su, lu svicine ai voi, al met ben a fûc lis speris.

ALVISE

No!!

Si alce di bot sul liet. Panic. Al cjale dulintor e si rint cont dal casin che lu circonde e dal casin che al à cumbinât. Le pôre i jentre tai vues.

ALVISE

NO!!!

INT. BAGN - CJAMARE 1511 - DÌ

ALVISE al jentre disperât intal bagn.

Si svuacare di corse la muse. Al siere la aghe, ma nol cjate il suiemar, al decît alore di suasi cul costum medievâl che si gjave vie di corse colant di schene tal box de doce. Al cjape une biele tonade.

INT. HOTEL SERENISSIME - CURIDÔR - DÌ

Il lusôr cjalt dal soreli al ilumine il curidôr dal Hotel SERENISSIME; tal aiar a si sint une musicute calme.

Tal curidôr si cjatin, une daspò di chê altre, lis stanziis dal Hotel: 1507, 1508, 1509, 1510.

Rivâts dongje de cjamare 1511 si tachin a sintî dai rumors stramps, come se cualchidun al fos daûr a barufâ e a spacâ su dut dentri de stanzie.

ALVISE (V.O.)

Lu copi.

Daspò di un moment di cidinôr la puarte de cjamare 1511 si spalanche. ALVISE al jes di corse.

Al à metût su dai vistits une vore elegants: gjachete, cjameise, golarine, bregons e scarpes abinades. Però i vistits a son metûs su di corse, ALVISE al è dut sbudielât.

Al strissine dilunc dal curidôr il so trolley mastodontic cun la cerniere miege rote.

INT. HOTEL SERENISSIME - RECEPTION - DÌ

Une Receptionist (30) elegante e professionâl e je daûr a lavorâ al ordenadôr.

Cuant che il rumôr dal trolley di ALVISE al rive aes sôs orelis, la Receptionist a ferme di bâti su la tastiere e lu salude in maniere professional. (NOTE: a fevele cun cadence veneziane, la fantate no è furlane)

RECEPTIONIST

Bundi siôr della Torre. Aial polsat  
ben? La gulizion-

ALVISE al passe devant de receptionist cence fâ câs aes sôs peraulis. La receptionist e cjale ALVISE che al jes dal Hotel, podopo e torne a sentasi te so postasian par continuâ il so lavôr al ordenadôr.

INT. CORIERE - DI

ALVISE al è sentât sul sedîl di une coriere. Al cjale fûr dal finestrin. Al semee mieç indurmidît e une vore devastât.

INT. STAZION DAI TRENS - SALE DI SPIETE - DI

ALVISE al à la stese espression di prime. Al è sentât dentri di une multietniche e rumorose sale di spiete de stazion dai trens.

INT. TREN - DI

ALVISE al à simpri la stese muse di pêt intant che al viaze dentri dal wagon di un tren regjonâl.

EXT. PLACE DAI UFIZIS - DI

Un mastodontic edifici, claramentri costruit sot dal regim fassist, al domine une place deserte e cementificade.

Parsore dal edifici la mastodontiche scrite: "Ministeri de sovranitât culturâl, de normalizazion identitarie e des politiches pes gnoves generazions de Regjon Friuli Inerzia Giulia cun particolâr rivuart a Peonis capitâl de culture europeane 2045 - insegne finaziade cul font EuroPeonis 45".

Di tant in tant cualchi impiegât elegantissim al jes cun pas pachidermic dal imponent palaç musolinian.

ALVISE al cjamine spedît, al travierse dute la place grise e vueite strissinant il so trolley come une vuarzine intun ort.

Al cjamine e al cjamine, al strissine e al strissine il so trolley, fin tant che al jentre tal edifici imperiâl.

La place e reste par cualchi secont in plen cidinôr.

Podopo, di bot, ALVISE al jes esatamentri come che al jere jentrât. Al traviese la place di un pont a chel altri, al cjamine a pas spedît e al strissine il so trolley. Al è claramentri imbesteât.

ALVISE  
(al berle)  
No! NO! Lu copi! LU COPI!

INT. ALTRE STAZION DAI TRENS - SALE DI SPIETE - TRAMONT

ALVISE si mangje lis ongulis instant che al spiete il so tren dentri di une altre salute di spiete di une altre stazion dai trens.

INT. TREN - TRAMONT

ALVISE al è sentât dentri dal vagon, al cjale l'orloj. La lûs dal tramont e colore di ros la sô muse disperade.

INT. CORIERE - TRAMONT

ALVISE al viaze in coriere, al mastie cun rabie un kebab, lis sôs mans a son sporcjis di ketchup.

INT. HOTEL SERENISSIME - RECEPTION - TRAMONT

La Receptionist e je ancjemò daûr a lavorà al ordenadôr.

Cuant che la puarte dal Hotel SERENISSIME si vierç la Receptionist e alce i voi e e reste di stuc. I soi dêts no batin plui su la tastiere.

RECEPTIONIST  
Bu-Buinesere.

ALVISE, disfat e strac, a si svicine ben planc al banc de reception, al strissine il so trolley su le moquette rosse dal Hotel.

ALVISE  
Sere.

RECEPTIONIST  
Aial bisugne di alc?

ALVISE  
Mi domandavi... Par câs vuê isal,-

RECEPTIONIST  
Vuê?

ALVISE  
Sì. Ce dì isal vuê?

RECEPTIONIST  
Il 27.

ALVISE  
Joibe?

RECEPTIONIST  
Joibe 27, esat.

ALVISE  
Ah.  
(polse)  
E doman invezit-

RECEPTIONIST  
Vinars 28.

ALVISE  
Vinars?

RECEPTIONIST  
Vinars 28.  
(polse)  
Doman al partìs, siôr Dalla Torre.  
Mi à domandât di svealu a buinore.

ALVISE  
Doman, sì. Joibe.

RECEPTIONIST  
Rivial a fâ gulizion prime dal  
check out?

ALVISE  
No-No crôt parceche-

ALVISE nol à la fuarce par finî il discôrs, al sta cuasi par  
metisi a vaî, ma cuntun ultim sfuarç si ten.

ALVISE  
Gnot.

RECEPTIONIST  
Buinegnot.

ALVISE al va viers lis stanziis, podopo al torne indaûr.

ALVISE  
Chest apuntament di doman-

RECEPTIONIST  
Al semee vore impuantant.

ALVISE  
Al è une vore impuantant.

RECEPTIONIST  
Lu clamarai a buinore, cussì al è  
sigûr di sveassi.

ALVISE

A sîs?

RECEPTIONIST

A sîs.

ALVISE

A sîs. Perfet.

(polse)

Ah, e se i Savorgnan a vessin di  
cirîmi-

RECEPTIONIST

Cui?

La Receptionist a semee un tic spauride. ALVISE, forsit, a lu note. Le atmosfere e je une vore strambe.

ALVISE

I Savorgnan. Un in particolâr: chel  
Savorgnan. Chel de fiestute di  
nossere. Se a ves di cirîmi, par  
bevi le ultime.

RECEPTIONIST

O la penultime.

La Receptionist a fâs muse di ridi, ma ALVISE al reste seri.

ALVISE

Ce?

La Receptionist a torne serie.

RECEPTIONIST

No si visial? Vuê, a è joibe  
grasse.

ALVISE

No. No vuê. No par me. Si sin  
capîts?

RECEPTIONIST

(spaurîde)

Sì. Sì sin capîts.

ALVISE

Benon.

(polse)

No simpri ti capite une seconde  
oportunitât te vite, nomo?

ALVISE si invie viers lis stanzis.

La Receptionist lu cjale slontanasi cuntune ponte di pôre tai voi.

Cuant che ALVISE al è lontan la Receptionist a côr al telefon e a clame la cjamare 1511. Il telefon al sune a vueit.

RECEPTIONIST  
Rispaint! Supo... Toni! Toni!

INT. ASSENSÔR - TRAMONT

ALVISE, strac e devastât al è tal assensôr. Si cjale tal spieldi. Si juste un tic le golarine. Al spiete di rivâ al so plan.

INT. HOTEL SERENISSIME - CURIDÔR - TRAMONT

ALVISE al travierse il curidôr dal Hotel SERENISSIME; si tire daûr il trolley pesant tant che un cadavar.

Al passe denant de stanziis 1508, 1509, 1510, ma cuanche al rive denant de sô cjamare, la 1511, al reste di clap.

De stanzie 1511 al jes un sun di musiche tecno, il vosâ di int euforiche che e cjacare: un trop di int e sta fasint un fieston dentri de sô stanzie.

ALVISE al lasse colâ il trolley tal mieç dal curidôr.

ALVISE  
No! NOOO!!

Disperât al volarès lâ vie, podopo al cjape coragjo e al vierç la puarte de sô stanzie: une sborfade di curiandui e sarpantinis i rivin intôr.

ALVISE, calm, al jentre dentri.

Apene jentrât si sint la int che i dà il benvignût cuntun batimans. Dai suns si capis che a son duç cjos in bale.

I suns de fieste a jemplin il curidôr. La puarte de stanzie 1511 e je restade mieze vierte. Il trolley di ALVISE al polse par tiere tal mieç dal curidôr.

Di bot: un ton! Bang!

Podopo un altri ton! Bang!

Dentri de stanzie 1511 une fantate e berghele, bang! Si sintin i rumôrs dai cuarps che a sbatin cuintrî lis parêts,

bang! Bang! Bang!

La musiche e ven studade. Cidinôr.

ANTONIO Savorgnan (40), in costum di carnevâl, dut insanganât al jes de stanzie 1511. Al è ferít, spaurít. Al cîr di scjampâ ma si inçopede sul trolley che ALVISE al à lassât tal mieç dal curidôr e al cole par tiere.

ANTONIO al cîr di scjampâ strissinant su la moquette rosse. Al cîr di slontanasi plui di corse pusibil, ma la feride e il panic lu ralentin.

Al passe denant de stanziis 1510, 1509, 1508.

ALVISE al jes de stanzie 1511. Al è insanganât di plante fûr. Al viôt ANTONIO che si slontane tal curidôr e i ponte la pistole cuintrî.

Click!

Nol à plui colps in cane.

Click! Click!

Al prove plui voltis, ma nuie di fâ.

ALVISE al bute la pistole par tiere. Al tire su di pêș il so pesantissim trolley e si svicine a ANTONIO.

ANTONIO

Ti prei! Ti prei! Alvise. Cjalimi.  
I soi Toni. Il to amì Toni. I sin  
compaesans nomo? Supo. O volevi  
dome... a è joibe grasse! Ce vevio  
di fâ? O volevi dome fâ fieste.

ALVISE si met parsore a ANTONIO, lu cjale cence compassion cul trolley parsore dal cjâf.

ALVISE

Ti rindistu cont de figure che o ai  
fat vuê? Falât zornade. Falât  
orari.

ANTONIO

No è colpe me!

ALVISE

Cui mi aial incjocât? Eh? TU!  
MALEDET! Tu no tu sâs cemût che a  
mi an cjalât chei dal Ministeri de  
sovranitât culturâl, de  
normalizazion identitarie e des

politiches pes gnoves generazions  
de Regjon Friuli Inerzia Giulia cun  
particolâr rivuart a Peonis capitâl  
de culture europeane 2045!  
EuroPeonis 45! Ti rindistu cont?  
Eh?

-BANG!

Un colp di pistole, sparât de Receptionist, al fâs saltâ par  
aiar il cjâf di ALVISE.

ANTONIO terorizât al viôt prime il cuarp cence cjâf di  
ALVISE parsore di lui, ANTONIO al fâs prime muse di ridi,  
podopo al viôt il trolley di ALVISE che i cole intôr-

-il cjâf di ANTONIO al tone sot il pês da trolley, sborfant  
sanc in dut il curidôr.

A reste vive dome la Receptionist.

#### **TITUL DI CODE**

**"Dos robis mi emplin il cûr di maravee: il cîl stelât  
parsore di me e l'autolesionism dai furlans" I. Kant,  
filosof forest**

FIN.